

漢太邱長仲弓陳公碑銘

先生諱實字仲弓潁川許昌人也其先出自有虞氏中葉當周之盛德有嬀滿者武王配以太姬而封諸太昊之墟是爲陳胡公春秋之末失其爵土遂以國氏焉先生含聖哲之清和盡人才之上美光明配於日月廣大資乎天地如鄉黨則恂恂焉斌斌焉善誘善導仁而愛人使夫少長咸安懷之其爲道也用行舍藏進退可度不徼訐以干時不遷怒以臨下四爲郡功曹五辟豫州六辟三府再辟大將軍宰聞喜半歲太邱一年德務中庸教敦不肅政以禮成化行有謚會遭黨事禁錮二十年樂天

知命澹然自逸及文書赦宥時年已七十遂隱邱山懸車告老
四門備禮閒心靜居大將軍何公進司徒袁公紹前後招辟先
生曰絕望已久飾巾待期而已皆遂不至太尉弘震楊公賜東
海陳公耽每在袞職羣僚賀之皆舉手曰潁川陳君命世絕倫
大位未躋慙於文仲竊位之負故時人高其德重於公相之位
也年八十有三中平三年八月丙子卒羣公百僚莫不咨嗟巖
藪知名失聲揮淚大將軍三公往弔於祠祭以中牢會葬作誄
謚曰文範先生刺史太守樹碑頌德許令以下至於國人立
廟舊邑四時烝嘗歡哀承祀其如祖禰荀慈明韓元長等五百

餘人總麻設位哀以送之遠近會葬者千人以上河南尹种府君南陽太守曹府君追嘆功德述錄高行固上世所罕有前哲所不過可謂存榮歿哀而不朽者也先生有二子元方季方皆命世希有繼其特立季方早亡亦圖容加諡元方在喪毀瘁消形嘔血過哀純孝而已乃作銘曰峩峩崇岳吐符降神於皇先生抱寶懷珍如何昊窮旣喪斯文微言圯絕來者何聞交交黃鳥爰集於棘命不可贖哀何有極

漢中郎蔡邕撰